

# 1. VIZIJA I CILJEVI

1.1. Bosna i Hercegovina će, slijedeći evropske procese, ubrzanom primjenom savremenih informacionih i komunikacionih tehnologija izgraditi modernu ekonomiju i društvo u kojem su informacije, znanje i ljudski resursi od vitalnog značaja.

1.2. Građani BiH će u informacionom društvu biti osposobljeni za prihvatanje novih poslova i tehnologija, a brz i jednostavan pristup željenim informacijama biće omogućen svima. Rad državnih organa biće transparentan, a usluge i servisi jeftini i efikasni. Kompanije će biti uključene u visokoprotivni razvoj i primjenu naprednih tehnologija. Bosna i Hercegovina će biti dio razvijene Evrope i član Evropske Unije.

1.3. Razvojem informacionog društva Bosne i Hercegovine biće stvoreni uslovi da se znanjem i idejama unaprijeđuje razvoj obrazovanja, zdravstva, ekonomije, uprave, kao i društveni standard svih građana Bosne i Hercegovine.

Bosna i Hercegovina će razvojem informacionog društva transformirati sadašnju nerazvijenu ekonomiju i društvo u srednje razvijenu ekonomiju i društvo, sposobnu za integraciju u Evropsku uniju do kraja 2010 godine.

1.4. Ciljevi razvoja informacionog društva, kroz široku primjenu informacionih i komunikacionih tehnologija i Interneta u svim segmentima društva, utvrđeni ovom Politikom, su sljedeći:

- povećanje znanja i sposobnosti građana za rad i život u informacionom društvu,
- stvaranje novog tržišnog ambijenta, novih poslovnih procesa, znanja i adekvatnih načina organizovanja,
- povećanje rentabilnosti, konkurentnosti, kvaniteta i kvaliteta usluga i proizvoda, primjene inovacija u ekonomiji, upravi i drugim oblastima,
- povećanje investicija i zaposlenosti,
- razvoj industrije informacionih i komunikacionih tehnologija (softver, inženjering, hardver, konsalting),
- razvoj malih i srednjih preduzeća,
- dostizanje održivog ekonomskog razvoja uz zaštitu okoliša,
- povećanje standarda građana,
- ravnomjeran razvoj informacionog društva, uključujući udaljena (ruralna) područja,
- povećanje bruto nacionalnog dohotka,
- dostizanje uslova za evropske i regionalne integracije.